


山東濟南府平原縣鄉土志輯稿



歷史

封爵

戰國齊宣王少子通封於平原陸鄉後為陸氏

趙平原君公子勝惠文王元年封

周啟以東周善於秦而封於平原

漢平原君朱建高祖賜號

郇侯呂宅 高后四年封

郇侯樂布 景帝六年封

東漢郇侯馬武 世祖建武十三年封

平原懷王勝 和帝長子延平元年封

平原哀王得 鄧太后以懷王無子紹封

平原王翼 安帝以哀王無子紹封

平原王碩 建和二年封

郇侯趙苞 靈帝時封

平原侯曹植 建安十六年封即魏陳思王

魏平原王曹叡 黃初三年封

平原侯郭憲 明帝太和六年封

晉平原王司馬幹 宣帝子武帝受禪封

前秦平原公苻靚 皇始元年封

平原王苻鏘 太安元年封

後燕平原公慕容元

後秦平原公姚謚 姚興子弘始五年封



夏平原公赫連定

北魏繹幕子崔恬 道武帝賜爵

平原王元祉 孝莊帝永安二年封

平原伯崔庠 孝莊帝賜爵

平原公長孫裕 即唐太宗長孫皇后曾祖

平原縣伯崔猷 西魏文帝大統中封

平原縣公王光 西魏時封

北齊平原王高隆之 天保元年封

後周平原縣伯長孫義貞

平原縣公社整 從武帝平齊封

隋平原縣常明 開皇元年與定新律

平原王裕 開皇十六年封

唐平原王白駒 高祖受禪封

平原縣公封德彝 高祖武德初封

明平原王還壘 太祖曾孫

名宦

漢蕭望之字長倩東海蘭陵人徙杜陵好學治齊詩以射策甲科為郎及霍禹繼光為大司馬京師雨雹望之奏陰陽不和是大臣任政一姓擅勢所致元康初累遷諫大夫霍氏敗益任用會選諫大夫通政事者補郡國守相以為平原太守

伏湛字惠公琅邪東武人更始時為平原太守時倉卒兵起天下驚擾湛獨晏然不廢教授謂妻子曰一穀不登國君徹膳今民

皆饑奈何獨飽乃共食麤糲悉分俸祿以賑鄉里門下督謀欲為湛起兵湛惡其惑眾即斬以徇於是吏民信向郡賴以全趙憲字伯陽南陽宛人少有節操建武十七年遷平原太守時平原多盜賊憲與諸郡討捕斬其渠帥餘黨當坐者數千人憲上言惡惡止其身可一切徙京師近郡帝從之於是擢舉義行誅鉏姦惡後青州大蝗侵入平原界即死歲屢有年百姓歌之徵入為太僕

史弼字公謙陳留考城人桓帝時出為平原相會詔書下舉鉤黨郡國所奏多至數百弼獨無所上詔書迫切從事坐傳青曰青州六郡其五有黨平原何理而得獨無弼曰先王疆理天下畫界分境水土異齊風俗不同他郡自有平原自無胡可相比若

承望上司誣陷良善則平原之人戶可為黨相有死而已所不能也從事大怒遂舉奏弼會黨禁解弼以佞贖罪得免濟活者千餘人

唐顏真卿字清臣琅邪臨沂人博學工辭章書法事親孝舉進士累遷殿中侍御史宰相楊國忠惡之出為平原太守迨安祿山反河朔盡陷獨平原城守具備從兄杲卿為常山太守斬賊將清土門十七郡同日自歸推真卿為盟主兵二十萬加河北招討使用李萼計遣大將李擇交副將范冬馥等擊走賊將袁知泰斬首萬級肅宗即位靈武真卿以蠟丸裹書陳事時軍費困竭真卿收景城鹽使諸郡相輸用度遂不乏後入朝授憲部尚書為唐名臣

明王維藩號淮洲河南信陽人以選貢萬厯四年任年力壯盛有幹才而甚愛民日夜拊循問所疾苦親行阡陌間課農墾藝四境幾無曠土招撫流亡授之廬舍旱則露禱饑則弛祿以賑尤加意學校文行兼勉諸生有婚喪不能備禮者輒周卹有差恐難為繼斤俸金置學田百二十畝到今賴之維藩厯官長蘆運同

劉思誠字克實號定字直隸山海衛人登萬厯癸酉鄉薦十五年任歲正大祿姦盜縱橫流離遍野思誠惠威並用設施一本乎民情民愛戴之如慈父母陞濟南府同知民共立祠東閔春秋享祀等於其私親焉

政蹟

漢匡衡字稚圭東海承人宣帝時補平原文學學者多上書薦衡經明當甚少雙京師後進皆欲從衡平原衡不宜在遠方事下太子太傅蕭望之問衡對詩諸大義望之奏衡經學精習說有師道帝不甚用儒遣歸官元帝即位以史高薦遷給事中後為丞相封樂安侯

劉雄不知何許人為平原令甚著威惠永初二年劇賊畢豪等犯縣界雄自將吏士乘船追之及於厭次河與賊合戰衆寡不敵賊執雄以矛刺之小吏所輔伐死雄乃免

楊匡字叔康陳留人好學嘗在外黃大澤教授門徒補蘄長政有異績遷平原令時國相徐曾中常侍璜之兄也匡恥與接事託疾去初辟為太尉杜喬掾後喬為梁冀中傷與李固俱死暴尸

城北匡聞之號泣星行到洛陽乃著故赤情託為夏門亭吏守
衛尸喪積十二日都官從事執之太后義而不罪於是帶銖貫
請關上書乞李杜骸骨太后許之匡成禮殯歛送喬喪還家葬
送行服隱匿不仕

劉備字玄德涿郡人獻帝時公孫瓚表為別部司馬拒袁紹數有
戰功試守平原令後領平原相弘雅有信義甚得人心後為昭
烈帝

晉阮种字德猷陳留尉氏人舉賢良方正對策第一武帝泰始中
為平原相為政簡惠百姓歌之帝嘗曰二千石皆若此朕何憂
平卒於郡

邵續字嗣祖魏郡安陽人元帝時以敗石勒功拜平原太守後勒
遣石季龍乘虛圍續掠其居人續出救季龍伏騎斷其後遂執
續送勒不屈勒初敬禮之尋過害

劉遐字正長廣平易陽人性果毅有勇畧當懷愍既陷遐壁於河
濟之間賊不敢逼間道遣使受元帝節度帝璽書慰勉以為平
原內史遐妻邵續女驍勇有父風遐曾為石季龍所圍妻單騎
拔遐於萬眾之中

南燕杜雄本縣人慕容德僭立其母兄先在長安德恐遣雄子弘
如長安問存否弘對曰臣至長安若不奉太后動止即西如張
掖以死為効臣父雄年踰六十未沾榮貴乞本縣之祿以申烏
烏之情德曰弘為君迎親為父求祿忠孝人也乃以雄為平原
令

元統石烈名建年字九齡大德間尹平原恭惠寬和公貞峻潔而濟之以敏幹修廟學增禮器方春勸課召鄉子弟告以孝悌力田有賞荒惰弗藝有罰革公胥之弊懲往來之擾定力役法著甲乙籍四境熙然且經綸縝密公館道塗吠澮郵遞無不修舉邑人樹碑以紀異績

張仲鑑曹南人元統中平原尹操履清白政教兼舉不專於寬而人安之不瀕於猛而人畏之吏民雍睦一邑稱治號賢令云

明方泉字仲年浙江淳安人永樂時知平原縣為政簡易愛民如子嘗為賊所執民相率入賊中曰奈何亂吾父母泣下沾衣賊憐而還之秩滿陞滄州同知

李經江西吉安人由監生任公勤廉謹應政九年當代民沐其惠

請闕乞留復任九年囊如懸罄至今頌之

盧恭江西萍鄉人由監生任勸農敷教愛養黎元建置倉廩積穀二萬餘石以備旱澇植樹萬有餘株以蔭行人當時比之甘棠文祥四川南溪人由舉人補任心存愷悌政尚寬和在官七年始終如一以老致仕民咸懷其德

周密南直寶應人成化初由監生任鉏惡植善敬老育賢興革利弊修濬城池三載政舉民安以憂去百姓追思不置以前有文君後有周君比諸召杜

李鉉直隸鹽山舉人由商河丞陞任時當旱澇之餘人民凋瘵鉉撫安善類鉏擊兇頑公勤總察剖決如流囹圄無桎梏之囚廩膾有陳因之粟修葺壇壝公署倉廩設法措置費不及民泣政

三年民懷吏畏以憂去

文皓字孔揚山西垣曲人弘治丙辰進士令平原誠求利病嘗罰
公明政教大行民安盜息後歷河南副使

朱良江西新淦人弘治中由進士任息成兼濟教養備舉守文之
政人有畫一勿失之謠去猶見思

楊鑑錦衣衛籍山西壺關人由進士任平居無疾言遽色而廉明
公毅凜不可犯養老興才抑強扶弱於童子讀書亦親為之正
句讀屬對偶藹然有父母斯民之意憲副張一厚贊其化洽庠
序惠溥黎氓如水之清如鑑之平人咸以為稱情云

鄭金直隸南皮人隆慶中由進士任瑞方敏練宿弊盡革人不得
售其奸愛民猶子理邑事如家事區處合宜不事阿媚院司有

以厨傳不豐為言者弗介意也臨行猶惓惓邑事惟恐一旦廢
弛而小民失業窮鄉下戶涕泣遠送者千餘人迄今民皆思之
不置

國朝李瑤直隸高陽人由監生康熙二十一年任方下車早馳千里
瑤虔誠步禱甘霖獨沛於境內歲以有秋人咸異之日夕留心
民杜長才善馭百廢具興如修廟學築城垣皆不費於民而事
集嘗聞諸鄉達云村無吠犬獄無滯囚可想見其時政俗矣

鞠濂字叔溪號連隱大嵩衛人雍正丁未由廩列貢生司訓平原
工古文辭尤邃於性理之學誨人不倦請益者日衆暑齋至不
能容乃假學西張郡守炯生園居以相授受從遊率成佳士至
今猶佩其教

漢東方朔字曼倩武帝時上書自譽令符詔金馬門建元中以諫
營上林苑拜大中大夫時天下侈靡趨末百姓多離農畝朔陳
孝文節儉諷帝燔甲乙之帳却走馬示不復用又凍農戰強國
之計朔指意放蕩喜詼諧然常觀察顏色直言切諫上雅納之
著有客難及非有先生論世多目為神仙

高詡字季回以父任為郎中世傳魯詩以信行清操知名王莽篡
位稱盲逃不仕光武即位大司空宋弘薦詡徵為郎歷博士拜
大司農在朝以方正稱卒官賜錢及冢田

成瑁世字季明少好學明道術為郎史嘗諫鄧太后歸政抵罪後
安帝徵為尚書即見納用延光中中常侍樊豐等譖廢太子保
為濟陰王瑁世連上書訟之豐因陷以重罪下獄免歸及濟陰
王立是為順帝徵拜議郎不受執政者交引除尚書在朝正色
百僚敬之

晉劉寔字子真少貧賣牛衣以自給好學博通古今清身潔已郡
察孝廉不行以計吏入洛調為河南尹丞歷吏部郎叅文帝相
國軍事封循陽子時鐘會卸衣負寔料其皆不還後果然其先
見類如此以世多進趨康遜道闕乃著崇讓論以矯之元康初
進爵為侯後策拜司空終太尉諡曰元

明任士邁字可依生有異稟好讀書年十八舉於鄉越四年成進
士選庶常時分宜當國不屑攀附改禮部主事尋調吏部掌選
以清正稱歷順天府尹禁科派抑貴戚督下特以安靖賞奏張

真人俸賜大濫怙寵毒民請削黜治罪事中寢出貳南京工部
尋改兵部巡撫江西會穆宗初政有止章請奪真人世封者下
江西守臣議士憑因力言之卒行其志在任正己率屬簡靜愛
民以忤時乞罷復起南京刑部侍郎卒官賜祭葬

耿儒嘉靖甲寅以選首為平鄉令愛民如子唯恐傷之每鞠獄不
忍加刑不得已則哀矜之意溢於詞色定爰書未嘗不泣下也
歲丁巳城北蝗生蔓延四十餘里儒晝夜驅撲詳請蠲賑不報
自念有地十二頃在本籍韓家庄因遣信亟歸盡鬻之輦金易
粟以賑災民感泣又二載致仕冢徒壁立絕不介意日手一編
以壽終

趙煇號緝齋登進士令長垣以三尺繩慄猾而興味良民賦役均
平屢決疑獄考最拜御史按廣東剔珠池番船之厲及瓜不持
一珠累遷苑馬寺卿清屯牧足芻豈數年馬大蕃息會有殺人
盜主者捕士人掠治已誣服矣煇得真盜於秦隴間移案直之
主者慙撫煇入覲不宜縣次續食論謫少卿遷叅政分守臨鞏
鞏旱燥之水泉往往掘井數十丈不得煇接視近郡古淤河可
治即決注郡中而以其支旁溉田數千畝民以永利名曰趙公
河後分守閩之建南加廉使銜引年歸里

宋仕字原學號可泉隆慶辛未進士江陵相其座主也熏灼特仕
屏跡不至其門兩宰大縣有惠政人尸祝之入為監察御史出
按四川蜀藩戚某橫恣執而寘諸法按畝均賦奏蠲鹽井浮課
九千有奇再按吳中所興革十二事皆兩畫後撫畿南當游祿

請蠲請賑全活無算會潞王之國民多驚匿仕孰往例以約束中涓無敢鳴張者別奇共民兵為二營以杜冒餉繕關隘城堡以謹干楸晉副都御史改撫應天監司特總按姻婭不職仕劾罷之遂轉南大理卿以齟齬告歸築繹幕園居之凡二十年起留京少司寇疏請議蠲恤革權稅除貪政原累臣擢南總憲兼攝三部事屢請補大僚選言官不報以勞卒贈太子少保賜祭葬廕一手仕孝友和易自奉儉素而好周人之急嫉邪扶正當官則死其職蓋天性也

國朝董振秀字健華性警敏個儻有大志明末土寇遽起振秀練鄉勇為守禦又值歲饑捐資施粥活饑民數萬人由功貢通判太平賑饑民練鄉勇亦身任之獻賊陷和州將渡振秀盡撤江中

舟親宿麗譙修戰守具甚精備賊訖不能犯姑孰瀕湖稱盜數振秀仗壯士舟中命二三羸弱者擊棹陽為商賈狀盜望見遽登舟伏甲突出盡擒之累陞叅議守處州王師由浙入閩得振秀奇其才改驛傳兵備道振秀籌其便宜可行者以次布為條紀故乘傳無誤民亦不至重困適海寇變起振秀日夜督守禦不少懈登俾見水步門外賊營不整多輜重乃躬擐甲胄率兵潛出擊破之獲糧數萬斛兵民賴以全濟一日寇繕攻具勢甚厲民懼服散衣聚城隅下中丞疑將內潰命悉阮之振秀所汎地獨不戮一人一時倚為長城

張吉士字松霞性至孝侍父疾五年無怠色以進士令武功時山寇竊發戎馬繹騷吉士外調甯饒內畫守禦撫戢遺黎邑以安

枕晉職方即歷浙江督糧道漏卮盡杜漕弊一清補嘉湖兵備以哭母卒吉士博極羣書學兼體用性理通鑑史傳俱有評纂任有剛字無愆以恩貢知黃巖縣久無科甲文風萎削有剛立義學延名師公餘輒親為講課首拔張公希良以激獎之人思自奮從此雋甲乙榜者不乏闔縣建祠以祀陞太原同知致仕歸復設義學以教鄉之子弟性喜施予所交多賢豪文采風流為一時領袖其詩古文及書畫並稱四絕於古今翰墨衡鑒尤精

張永鏊字常膏邑廩生篤學好善學宮傾圮輸貲助修復身任督工之勞邑當寇衝城西北塌數十丈倡義捐築不三日而堅完可守歲洊饑出粟煮賑全活者衆鄉黨中貧不任婚喪者助之資無地可葬者為置義冢倡立義社以合族復延師以教其子弟家法整肅到今稱之

張自涵字施普永鏊子順治戊子己丑連捷知遷安縣民貧俗悍自涵備荒政清驛站禁包攬勸民勤業化獷以馴以卓具入為比部即平反大獄執議不撓擢山西僉事分巡宣武兼攝鴈代周視要害以右衛水口為西陲必窺之道厚集其餼使與大同兩腋相倚廟偏鴈為常山蛇勢轉河南叅議未三月廷推以副使分巡黔之安平宣布威德撫納新附水西未定羽檄交馳自涵隨宜肆應以勞懋卒官

董允禎字兆先振秀子天姿奇穎於古今典冊一見輒悟年十五補郡諸生後育成均為司訓喜交游重意氣鑿往察變洞若觀

火隨父官處州時土寇散走浙東乘勢剽奪允禎奉母居景寧先事綢繆卒遠風鶴之警生平扶危濟困汲汲如不及曲陸店官道橋圯行人病涉捐金獨修明末兵饑枯骨遍野募收瘞於西郊毛家廟後塚大如阜於宗族恩誼尤篤倡為族社醴穀盈千石以供歲時祭祀餘則散族之貧者大畧仿范文正風云

董訥字茲重號默菴允禎子康熙丁未探花及第由侍從歷御史督學順天禁供應却賄囑士風整肅主乙丑會闈得人尤盛及遷左都御史益自奮厲正色率屬論議務持大體惡士子夤緣疏更京闈分校例飭五城命案速結毋許株連叢巡捕營清虛冒嚴徼巡而盜無慝所定子錢禁重債而勢豪屏息嘗清理刑獄多所平反尋以兵部尚書總督兩江激濁揚清兵民安輯河

工屯田為淮徐民害特奏罷之復督漕運設易知小單裁船政廳官以杜扣剋糧艘至許旗丁傳鼓投文即驗放行抽運白糧預查冊內新船今旗丁當堂掣籤而需索營求之弊絕訥為人峭直沈雄言笑不苟遇事果達不以難易回屈歷官中外皆有赫赫聲及歸里也立族社設祭田一遵父允禎家法後分修高堰以疾卒於清河館舍康熙四十一年冬

聖祖仁皇帝南巡幸訥故居思之

御書眷念舊勞四大字命其子文選司印中思凝懸諸墓門

趙瑋字韋玉幼孤事母至孝撫兩孤姪恩義曲盡祖時和嘗捐義田贍族瑋增置四十畝俱勒其疆界於石以杜侵冒倡建宗祠申明家訓族人被誣累者力拯之諸鬻女贖而嫁之聚中外子

姓於家塾延宿儒教之俾均底於成康熙庚申授萊州府學訓導至則招集諸生立月課法拔其尤者廩給之而庚午經魁宿且幼孤育多外侮瑋扶掖尤至修葺府學畢復捐俸置樂器聘儒童肄習三月而八音備著聖樂元音及典禮議畧二卷呈各憲有持議精詳具見卓識之褒生平篤學嗜古於經傳子史性理諸書外天官輿地龜筮兵家靡不究悉

孝義

漢禮震字仲威受尚書於歐陽歙建武十五年歙為司徒坐前守汝南贓罪下獄震時年十七聞獄當斷馳之京師行至獲嘉縣自繫上書乞殺身以代歙命書奏而歙已死獄中光武嘉其仁義拜為郎中

所輔縣小吏也永初二年劇賊畢豪等八縣界縣令劉雄將吏士乘船追之至厭次河與戰雄敗被執賊以矛刺之輔前叩頭求哀願以身代賊縱雄而刺輔背心洞背即死東郡太守捕得豪等具以狀上詔書追傷之賜錢二十萬除其父奉為郎中

魏邵舉孝廉前平原相史弼遷河東守忤中常侍候覽覽誣病誹謗徵下詔獄劾毀變形服詐為家僮瞻護於弼弼受誣當棄市劬與同郡人膏郡即行賂於覽得減死論

梁劉霽字士烜懷懋子九歲能誦左氏傳十四居父憂有至性每哭輒嘔血家貧與弟香敵相篤勵學博涉多通歷位西昌相海鹽令並以和理稱母明氏寢疾霽年已五十衣不解帶者七旬誦觀世音經數萬遍夜因感夢見一僧謂曰夫人算盡君精誠

為至當相為申延後六十餘日乃亡霽廬於墓側哀慟過禮常有雙白鶴馴翔廬側霽思慕不已未終喪而卒著釋俗語八卷

文集十卷

北魏房景遠字叔遐景伯幼弟也重然諾好施與頻歲凶儉分贍宗親又於通衢食餓者存濟甚衆平原劉郁行齊竟間遇劫賊已殺十餘人次至郁郁呼曰與君鄉里何忍見殺賊曰若言鄉里親是誰郁曰齊州主簿房陽是我姨兄賊驚曰我食其粥得活何得殺其親遂還衣服蒙活者二十餘人景遠好史傳不為章句事二兄至謹撫養兄孤恩訓甚篤益州刺史傅豎眼慕其名義啓為昭武府功曹參軍以母老不應卒於家

明王敬世居北郭外里許慈厚愷悌輕財施藥凡義所可為者雖匍匐以救而不辭成化八年饑疫餓莩載道敬過尸即葬一歲計埋三百餘又連歲水旱多流移敬罄其所有生給衣食死仍掩埋前後千餘人叅議唐行縣聞之亟加嘆賞勞以酒帛有司舉鄉飲賔

王鳳嘗為王府典膳性篤孝父疾鳳不入私室親嘗湯藥臥榻前者踰年父平居或不喜鳳率子孫羅跪於前或作舞態或為笑言務至父悅乃已供養豐備父每止之鳳泣曰七十非肉不飽父年已八十餘時進百羞兒心尚恐無及肯以貧而薄父子養乎及父歿鳳已六十餘矣哀毀骨立殆不勝喪三日始進食既葬廬於墓側有狐兔馴擾之異兩院並旌

杜甫成以農業起家積粟頗多性好施凡貧不能葬及不能嫁娶

者必助以粟寺觀募修輒與粟數十石成化八年歲凶民饑出粟千石以賑高唐禹城聞其名遣吏求借或令長自造其門人咸謂粟貴如此糶之可獲厚利勿與也甫成惻然曰人多饑餓以死吾獨為利而不救於心忍乎隨求隨倒廩應之粟殆罄無少恠色時皆稱為長者孫達弱冠食餼登弘治壬子鄉薦令陵川名節甚礪達四子名世名齊名魯名滕並邑廩生文學一門稱盛後名世以貢兩任縣令仁厚正大以清白傳家名魯尤長於詩有唐人遺矩僉謂甫成績善之報

任士審字汝問襁褓失父母迨長祭祀必泣念先隴累累後莖者不能容捐地擴之啓義塾訓族子弟母問疏戚緩急與共曰皆祖宗一體所分也有以謁選告貸者其人廉吏不能償質畝二

百取券焚之歲三稔為粥其饑者藥其病者瘞其道殮者家坐中落然好義益甚補邑廩生五試弗售遂謝去孫有剛自有傳張學孟字子孺以博士弟子輸粟補禮部儒官家素封忼慨好施人負子錢輒折券棄責有江西邵某者罹法當遠戍聚室而哭不欲生學孟行見之惻然立捐索金贖其罪邵得無行學孟與邵非素識亦不望報其急人厄多此類也時邑役繁重產無完者學孟曰肩之吾家敝護之一邑敝寧敝吾家爾遂毅然獨任其役家以中落及仲子國柱令臨賴學孟就養官署諭之曰若知吾家之所以敝則知所以為臨賴矣奈何使賴民以役累塗地類吾家也國柱遵其教多所釐革遂為循吏趙時和生有至性事父母能視聽於形聲之外工詩文字學蘭亭

幾於亂真以廩生貢成均因舉萬曆戊午京兆試念父煇嘗欲仿朱范文正公置義田以贍族未及竟其事而卒乃以田四百餘畝繼父志人稱孝焉孫瑋自有傳

董遇春其先自樂安占籍九傳至遇春家益起性慷慨雄邁陰行善事鄉里推重年八十瞿矐如壯夫崇禎丙子建橋二十尋於所居董路口河上勒石垂訓曰他日橋圯重修惟董氏子孫是任以永吾利濟之志蓋篤於行義耆老不衰如此以子振秀及曾孫訥貴累贈光祿大夫

李登科城東李家寨民明末土寇蜂起鄉民屈窟室避難中藏男婦數百人登科亦與焉偶以事出適遇賊執問眾匿所堅不告賊揮刀直研昏絕於地賊去復甦眾賴以全而登科遂缺一耳

人咸義之

國朝張嶽字五參增廣生研精經傳名噪文壇而少隨父懋謙於天津諳韜略具膽幹崇禎戊寅十二月大兵圍平原官僚紳士皆分堞固守有緣城欲登者嶽手鐵簡連擊却之城下大譁稱壯士嶽謂曰平原小勝之不武而守死無貳恐煩兵挫威能白大帥和解乎城下曰爾當赴營議之嶽即告主者繼而出城下軍裸縛嶽以見大帥嶽詞色慷慨往復動人大帥壯其義賜以狐裘解圍去城賴以完入

國朝屢試不售而門弟子多顯者辛年九十有三

鄭騰雲字冲漢候選州同慷慨有志節好周急待以舉火者甚眾拯人危難常奮不顧身時有人豪之目